

婦人門下

嬰兒門上

張氏醫通卷十一



張氏醫通卷十一

清 長洲石頑張 璐路王父纂述

男 以柔安世 叅訂

訥遜言

日本 大泉長菴前田安宅子仁

再訂

男 典子守

婦人門下

產後

經曰。乳子而病熱。脈懸小。手足溫則生。寒則死。

乳子中風熱。喘鳴肩息者。脈實大而緩則生。急則死。

上條言產後以乳哺子之時而患熱病。其脈只宜懸小。不

宜實大者。以產後新虛故也。設脈雖懸小。而見手足逆冷。

又爲脾氣衰絕。陰氣暴逆之候。亦主死也。下條言產後中風熱而至喘鳴肩息。以風熱逆於陽位。其脈必不能懸小。但須實大之中。而往來和緩。則脾胃之氣在其中矣。設見急疾。胃氣已絕。安得不死。後世以乳子二字誤認爲小兒。如張介賓之明。亦不加察。且因此而謂小兒不當視虎口三關。卽宜診兩手六部。非智者之一失歟。

金匱云。問曰。新產婦人有三病。一者病瘧。二者病鬱冒。三者大便難。何謂也。師曰。新產血虛多汗出。善中風。故令病瘧。亡血復汗。寒多。故令鬱冒。亡津液。胃燥。故大便難。產婦鬱冒。其脈微弱。嘔不能食。大便反堅。但頭汗出。所以然者。血虛而厥。厥而必冒。胃家欲解。必大汗出。以血虛下厥。孤陽上出。故頭汗出。所以產婦善汗出者。亡陰血虛。陽氣獨盛。故當汗出。陰

陽乃復。大便堅。嘔不能食。小柴胡湯主之。

病解能食。七八日更發熱者。此爲胃實。大承氣湯主之。

產後氣血俱虛。汗下皆禁。獨此一證用大承氣者。乃證治之變。不當以尋常例測也。以其病解之後。尚有餘熱在胃。所以能食。食入既多。至七八日更加發熱者。此必復傷飲食之故。故知胃有實結。恐其煎迫津液。故以急下救陰爲務。然必年體強旺。脈證俱實。且時日既久。與新產大便難不同。是可議下。設遇胃虛之人。雖能食而所食不多。卽有發熱便秘。亦屬血虛。急宜調養氣血。斷非承氣所宜。不可恣行攻擊也。

產後腹中疴痛。當歸生薑羊肉湯主之。并治腹中寒疝。虛勞不足。若寒多者。加生薑成一觔。痛多而嘔者。加橘皮一兩白。

木一兩。

產後腹中疝痛。乃寒積厥陰衝脉。故用辛溫以散血中之寒。助以血肉之性。大補精血。較諸補劑。功效懸殊。若腹痛兼嘔。而所嘔皆是稀痰。是知脾虛濁氣上逆。故加橘皮以宣散其氣。白朮以固護其脾。倘見血逆而嘔。所嘔渾是清水。腹脹滿急。則加桃仁肉桂。具見言外矣。至於寒疝虛勞。少腹結痛。總是下焦寒結。亦不越是方也。

產後腹痛。煩滿不得卧。枳實芍藥散主之。并主癰膿。以麥蘖下之。

仲景凡治腹痛。多用芍藥。以其能收陰氣之散也。以其能除血痺之痛也。以其能緩中而止急痛也。本草謂主邪氣腹痛。故多用之。蓋五氣之邪。莫如厥陰肝水之性急暴。一

有不平。則曲直作痛也。此方治疔痛。用芍藥爲主。佐以枳實炒黑。入血破積聚。收陰緩中。逐陳致新。麥粥補血下氣。而壯血脈也。

師曰。產婦腹痛。法當以枳實芍藥散。假令不愈者。此爲腹中有乾血著臍下。宜下瘀血湯主之。亦主經水不利。頓服之。新血下如豚肝。

血之燥乾凝著者。非芍藥枳實可能治。須用大黃桃仁蟅蟲。下其血閉。更加蜜以緩大黃之急也。

產後七八日。無太陽證。少腹堅痛。此惡露未盡。不大便。煩躁發熱。切脈微實。再倍發熱。日晡時煩躁者。不食。食則讞語。至夜卽愈。宜大承氣湯主之。熱在於裏。結在膀胱也。太陽爲表。膀胱爲裏。七八日表證入裏。故曰無太陽證。惡

露已爲病氣所鬱。不能盡去。因入裏。與惡露相搏。結在膀胱。而作少腹堅痛。下焦熱極。故不大便。煩躁發熱。更切其脉微實。再倍。其發熱在日晡時。而煩躁不食。熱邪又攻於胃。胃熱則不食。食入則穀氣之熱更助。兩熱相併。故譫語。至夜卽愈者。產後血虛。熱邪易入血室。入血室則夜如見鬼狀。言此以明其熱不在血室。而在膀胱與胃。故用大承氣湯也。

產後風續之數十日不解。頭微痛惡寒。時時有熱。心下悶。乾嘔。汗出雖久。陽旦證續在者。可與陽旦湯。

舉此與上文承氣湯爲表裏之例。

產後中風發熱。面正赤。喘而頭痛。竹葉湯主之。溫覆使汗出。頸項強。用大附子一枚。破之如豆。入前藥揚去沫。嘔者加半

夏半升。洗。

此證太陽上行至頭表。陽明脉過膈上循於面。二經合病。多加葛根。以葛根爲陽明解肌藥也。防風佐桂枝。去二經之風。竹葉桔梗主氣上喘。參草和中氣。薑棗行營衛。穀氣行。則上下交濟。而汗出解矣。附子恐是方後所加。治頸項强者。以邪在太陽。禁固其筋脉。不得屈伸。故用附子溫經散寒。揚去沫者。不使辛熱上浮之氣助其虛陽上逆也。若邪在胸而嘔。加半夏治之。上言破之。如豆入前藥。舊本作如豆大。今如徐忠可駁正。

婦人乳中虛。煩亂嘔逆。安中益氣。竹皮大圓主之。有熱者倍白薇。煩喘者加栝實一分。

乳中虛。言乳哺而乳汁去多。則陰血乏而胃中亦虛。陰乏

則火撓而神昏亂。胃虛則嘔逆。用甘草瀉心火。石膏療煩亂。竹皮主嘔逆。桂枝和營氣。又宣導諸藥。使無扞格之逆。煩喘者。爲心虛火動。故加栝實以安之。

產後下利虛極。白頭翁加甘草阿膠湯主之。

傷寒厥陰證。熱利下重者。用白頭翁湯。苦寒治熱。以堅腸胃。此產後氣血兩虛。故加阿膠甘草。然下利血滯也。古人云。血行則利自止。此方豈獨治產後哉。

婦人在草蓐。自發露得風。四肢苦煩熱。頭痛者。與小柴胡湯。頭不痛但煩者。千金三物黃芩湯。

自發露。謂自發衣露體得風。非邪外傷者。故不爲自汗風病。蓋產時天機開發。雖微風亦得入之。外感之風。內應之火。合化淫於四末。而作四肢苦煩熱。上至於頭作頭痛。病

在表裏之間。故用小柴胡湯。主治少陽。若頭不痛。是無表也。惟肝膽風熱內動。上膈作煩。故用黃芩退熱。苦參養肝。熟地補血而益腎水。則肝膽之火寧矣。

婦人產後虛羸不足。腹中刺痛不止。吸吸少氣。或苦少腹中急。摩痛引腰背。不能食飲。千金內補當歸建中湯。產後一月日得服四五劑。爲善。令人強壯。若大虛加飴糖六兩。湯成內之。於火上煖。令飴消。若去血過多。崩傷內衄不止。加地黃六兩。阿膠二兩。合八味湯。成內阿膠。

產後血去。營衛俱虛。內不充於五藏。肝木妄動。作腹中刺痛。上不充於膈中。遂吸吸少氣。下不濟於腎。故少腹急引。外連腰脊。六府不和。則不能食。用此以益營衛。伐肝邪。補中和內。○按此卽黃耆建中之變法。彼用黃耆以助外衛。

之陽。此用當歸以調內營之血。然助外則用桂枝。調中則

宜肉桂。兩不移易之定法也。

千金二字義見中風門方千金三黃湯下

諸禁。一禁卧。二禁酒。三禁浴。四禁寒。五禁汗。六禁下。七禁

利小便。八禁寒涼藥。九禁起動作勞。蓋初產血氣未定。遽卧

則惡血上升。故分娩之後。須高卧仰倚。功不可即卧。三朝始

可稍去其壅。尚宜高枕。七日後。如無他病。方可安枕。多有半

月後。未能貼席者。酒能助火亂經。誤用不無動血之虞。至如

雞子猪腎。一切滯氣堅紉難化物。及生冷膩滑。皆不可食。即

砂仁湯亦能動血。咸在禁例。浴能升動惡露。雖當夏月。亦須

禁之。曾有產數日後。因浴瘀血上衝而斃者。亦有因浴動血

誤用寒涼。瘀結不行。血化爲水。喘滿腫脹而死者。不可不慎

也。新產驟虛。最忌著寒。寒則血氣凝滯。諸變冗生。每至飲食

不化。腹痛作瀉。禍患莫測。欲去其瘀。則正氣并脫。欲止其瀉。則瘀結不行。惟薑桂參朮辛溫峻補。庶幾血行瀉止。故冬月一產。卽宜重綿兜護其腹。在夏月亦當複巾裹之。機要云。胎產之病。從厥陰無犯胃氣及上中二焦。爲之三禁。不可汗。不可下。不可利小便。制劑之法。能不犯三禁。則營衛自和而寒熱止矣。故產後雖有表證。一切風藥皆不可用。以其性升。不特載血上行。令人發暈。抑且令人亡陽。多致汗脫而死。不特風藥當禁。卽佛手散中芎藭皆爲散用。恐湯能發汗也。至於下藥尤爲功禁。非特硝黃難於輕試。卽溲便數難者只宜調養元氣。若車前澤瀉之類。咸非所宜。以產後百脈空疎。自裏至表無一不虛。虛則諸寒皆禁。卽芍藥亦難輕用。以其酸寒伐生發之氣也。地黃皆當慎用。以純陰之味。能令作瀉也。黃

芩能凝滯瘀血。令人惡露不行。爲害不淺。然皆產後常禁。設有表裏客邪。又不當拘於上說也。試觀金匱產後例中。陽旦湯之用芩芍。以其中有桂也。薛按八珍十全之用熟地芍藥。以其中有參朮及桂也。豈復拘於此例哉。況乎大承氣小柴胡三物黃芩下瘀血等方。皆產後治例。此聖人臨證如日。大轉回天之手。非尋常下士可得而測識也。迨夫早起作勞。不避風寒。不禁飲食。往往致成大病者。皆自作之孽耳。○凡產後之脉。寸口洪疾不調者死。沉微附骨不絕者生。緩滑沉小者吉。實大弦急者危。牢革結代及瀉滯不調者不治。

血暈。○產後元氣虧損。惡露乘虛上攻。眼花頭暈。或心下滿悶。神昏口噤。或痰涎壅盛者。急用熱童便主之。若血下多而暈。或神昏煩亂者。芎歸湯加入參三五錢。澤蘭葉一握。童便

半盞。兼補而散之。痰合二陳。加烏梅薑汁。并用鐵秤鎚燒令赤。以醋沃之。或燒漆器并亂髮。以烟熏之。產後因虛火載血上行而暈。用鹿茸灰爲細末。好酒童便灌下。一呷卽醒。行血極快。產後昏暈嘔逆。不能飲食。此胃虛挾痰所致。以抵聖散去赤芍。加炮薑茯苓。慎不可用芎歸血藥膩膈。其嘔逆愈不能止矣。○初產血暈。速與扶起。勿卧。用韭葉一握。切碎。入有嘴磁瓶中。將醋煎滾。澆入瓶內。急蓋瓶口。以嘴向婦鼻孔。令氣透入鼻中。卽蘇。若惡露未盡。忽昏悶不省人事。須問先因感氣而下胎者。以二陳加芎歸香附桃仁山查薑汁。切不可作中風治。產後口眼喎斜等證。當大補氣血。十全大補下黑龍丹。肥人佐以痰藥。如星半木香之類。若作中風治。而用小續命必殆。若腹中刺痛者。嚴氏清魂散。血暈語言顛倒健忘。

失志。此血入心包。宜失笑散加鬱金。或用血竭沒藥等分爲末。熱酒和童便調下二錢。良久再服。惡血自下。

三衝。敗血上衝有三。或歌舞談笑。或怒罵坐卧。甚者踰牆上屋。口咬拳打。山腔野調。號佛名神。此敗血衝心。多死。方書用龍齒清魂散。然用之多不應。不若花藥石散最捷。琥珀黑龍丹亦効。如雖悶亂。不致顛狂者。失笑散加鬱金。若飽悶嘔惡。腹滿脹痛者。曰衝胃。古法用五積散。余嘗用平胃加薑桂。往往獲効。不應送來復丹。嘔逆腹脹血化爲水者。金匱下瘀血湯。若面赤嘔逆欲死。曰衝肺。二味參蘇飲。甚則加芒硝蕩滌之。大抵衝心者。十難救。一衝胃者。五死五生。衝肺者。十全一二。○產後口鼻起黑色而鼻衄者。是胃氣虛敗而血滯也。急用二味參蘇飲。稍遲不救。

三急。○產後諸病。惟嘔吐盜汗泄瀉爲急。三者並見必危。痰閉心竅。抵聖散去芍藥。加炮薑茯苓。多汗加烏梅。慎不可用。浮麥傷胃耗氣。棗仁膩滑作瀉。芍藥五味酸收。皆能阻滯惡露也。

三審。○凡診新產婦。先審少腹痛與不痛。以徵惡露之有無。次審大便通與不通。以徵津液之盛衰。再審乳汁行與不行。及乎飲食多少。以徵胃氣之充饒。必先審此三者。以脈叅證。以證合脈。脈證相符。雖異尋常。治之必愈。脈證相反。縱無危候。必多變端。卽如產後惡露。常以彌月爲期。然間有六七朝卽淨者。又未可以概論也。此雖產母稟質不同。而胎之所稟亦異。如胎息壯盛。則氣血盡歸其子。瘀血自少。胎息孱弱。則氣血涵養有餘。瘀血必多。亦有產時去多。產後必少。產時去

少產後必多勢使然也。曾見一婦。艱產異常。三朝下一血塊。大小形色與茄無異。此後絕無瘀血。惟小便如皂莢汁。其少腹畧無痛楚。良由艱產過傷子宮。關闔廢弛。不能收斂。故其塊得下。世俗名兒枕者是也。大抵常產之婦。開闔有權。既產之後。子宮卽閉。兒枕隨氣攻注。碎作小塊。續續而下。所以綿延日期。此則全塊頓出。自無淋瀝之患。卽有餘血盡歸。溲便矣。此後屢見數婦。證雖大異尋常。以意逆之。其理自若也。產後血脈津傷。大便自應艱澀。每至五七日始通。無足怪也。其有發熱譫語。脈滑實者。又當急攻以救津液。若兼少腹鞭痛。又當破瘀爲先。產後三朝。每有寒熱蒸乳。寒熱後。乳汁大行。此胃氣孚化。雖有餘病。必無他慮。如無寒熱而乳汁充然者。血氣本旺也。若不寒熱無乳汁。此營衛不調。總無所苦。急宜